

DOMINGU II ADVENTU – TINAN A

Tema

Liturjia domingu ne'e nian konvida ita atu kolu an husi valór ne'ebé liu lais no egoísta. No hala'o revolusaun ida ita-nia mentalidade nian, nune'e valór fundamentál sira ne'ebé marka ita-nia moris bele sai valór sira "Reinu" nian.

Iha *primeira leitura*, profeta Isaías apresenta Jahwéh nia manu-ain ida, husi David nia uma-kai, iha ne'ebé Maromak nia Espíritu horik iha Nia; ninia misaun mak harii reinu justisa no dame rohan-laek nian, iha ne'ebé sei bandu divizaun no konflitu sira.

Iha *Evanjellu*, João Batista haklaken katak konkretizasaun Reinu ne'e nian besik daudaun ona... Maibé atu Reinu sai realidade moris nian iha mundu, João konvida ninia maluk sira atu muda mentalidade, valór sira, atu sira-nia moris bele fó fatin ba proposta ne'ebé atu mai... "Ida-ne'ebé atu mai" (Jezús) propoin ba ema sira batizmu ida "iha Espíritu Santu no iha ahi" ne'ebé sei halo sira sai "Maromak nia oan" no ho kbiit atu moris dinámika Reinu nian".

Segunda leitura dirije ba sira ne'ebé simu Jezús nia proposta Reinu nian: nu'udar Kristu nia oin vizivel iha ema nia leet, sarani sira tenke fó sasin uniaun, domin, partilla, armonia entre sira, hodi simu no tulun maun-alin sira ne'ebé fraku liu, tuir Jezús nia ezemplu.

LEITURA I – Is 11,1-10

Primeira leitura apresenta mai ita poema ida ne'ebé hafanun iha Povu Maromak nian David nia ukun nia fila-hikas.

La klaru enkuadramentu istóriku maibé poema ne'e mosu iha finál atividade profétika Isaías nian...

Liurai Ezequias bainhira atinje maioridade no hahú ukun (714 mK), nia buka hametin frente anti-assíria. Isaías kondena insiativa ne'e... Halo nune'e signífika tau konfiansa iha kbiit estranjeiru, no haluha Jahwéh nia kbiit, nune'e sinál grave infidelidade ba Maromak Judá nian. Inisiativa aliansa ho kbiit estranjeiru hamonu nasaun.... Defaktu, Isaías nia profesia sai realidade bainhira Senaquerib invade Jerusalém no obriga Ezequias submete ba kbiit Assíria nian (701 mK).

Profeta, iha tempu ne'e, deziludidu ho polítika liurai sira Judá nia, hahú mehi kona-ba tempu foun, laho kro'at no funu, justisa no dame rohan-laek nian. Reinu hanesan ne'e bele mai de'it hodi Jahwéh nia insiativa; no instrumentu Jahwéh nian iha Reinu ne'e nia implementasaun, tuir profeta nia opiniaun, mak David nia dexendente ida.

MENSAJEN

Iha primeira parte poema nian (vers. 1-5), profeta apresenta personajen ne'ebé sei sai Maromak nia instrumentu iha realizasaun "reinu" justisa no dame nian...

Uluknanai, profeta haklaken katak instrumentu ne'e mai husi "Jessé nia abut". Jessé mak David nia aman; nune'e nia mai husi dexendénsia David nian (kf. 2 Sm 7) no, sei lori fila fali tempu ideál moris-di'ak no dame nian durante David nia ukun.

Segundu, personajen ne'e sei hetan kbiit husi Maromak nia Espíritu ("ruah Jahwéh"). Espíritu hanesan ne'ebé tau orden iha kriasau (kf. Gn 1,2), ne'ebé anima erói karizmátiku sira Israel

nian (kf. Jz 3,10; 6,34; 11,29), ne'ebé inspira profeta sira (kf. Nm 11,17; 1 Sm 10,6.10; 19,20; 2 Sm 23,2; 2 Re 2,9; Mi 3,8; Is 48,16; 61,1; Zac 7,12). Espíritu ne'ebé fó ba Maromak nia manu-ain virtude boot sira ninia bei-ala sira-nian: sabedouria nointelijénsia hanesan Salomão, espíritu konsellu no fortaleza hanesan David, espíritu koñesimentu no hamta'uk Maromak nian hanesan patriarka no profeta sira (ba don neen ne'ebé temi iha ne'e, tradusaun grega "Setenta" nian aumenta tan "piedade": husi ne'e mak hun ba ita-nia lista don hitu Espíritu Santu nian).

Tanba nakonu ho karizma mak Nia bele hamosu justisa no konstrusaun "reinu" ida iha-ne'ebé ema kiak hetan respeitu no ema oprimidu sira hetan liberdade no dame. Sei la hetan injustisa, bosok, opresaun iha "reinu" ne'ebé Mesias atu hahú.

Iha segunda parte orákulu nian (vers. 6-9), profeta apresenta kuadru mundu foun nian ne'ebé "Mesias" sei lori. Ho ema nia revolta hasoru Maromak (kf. Gn 3) lori fatór dezekilfriu nian ne'ebé sobu armonia entre ema no natureza (kf. Gn 3,17-19), entre ema no nia maun-alin (kf. Gn 4)... Maibé "Mesias" sei lori dame, nune'e sei kumpre projetu inisiál Maromak nian ba mundu no ema: balada fuik sira no balada maus sei moris iha armonia no sira hotu sei hakruuk ba ema (reprezenta husi kosok-oan –katak ema ho ninia frajilidade tomak). Samea rasik (balada ne'ebé estraga armonia universál, no halo atu ema hadook an husi Maromak kriador) sei sai ida de'it iha armonia no dame rohan-laek.

Halakon tiha inimizade, dezarmonia sira, ema sei moris iha dame, iha komuñaun totál ho ninia Maromak (vers. 9). Iha paraízu dahuluk, ema hili atu sai Maromak nia inimigu no hili moris iha orgullu no autosufisiénsia; oras-ne'e, hodi Mesias nia obra, ema fila fali ba komuñaun ho ninia kriador no moris iha "koñesimentu Maromak nian". Moris nune'e katak lori hikas paraízu orijinál.

LEITURA II – Rom 15,4-9

Surat ba Romanu sira – ita dehan ona iha domingu kotuk – mak surat ida rekonsiliaun nian, dirije ba sarani sira Roma nian, maibé mós ba Kreda tomak Jezús harii. Iha altura ida ne'ebé diversidade kulturál fahe sarani sira husi judaizmu no husi paganizmu, surat ne'e hakarak hadook perigu divisaun Kreda nian no lori fiar-na'in hotu atu deskobre fila fali unidade fiar nian no igualdade fundamentál hotu-hotu nian iha Maromak nia oin. Husi momentu hili Kristu no simu batizmu, hotu-hotu simu Maromak nia don, iha asesu ba salvasaun no sai maun-alin, no simu bolun atu moris iha domin.

Testu ne'ebé propoin mai ita pertense ba parte daruak surat ne'e nian. Iha parte ne'e (husi Rm 12,1 ba 15,13), Paulo ezorta sarani sira atu moris iha domin; iha konkretu, fó ba sarani sira indikasaun prátika ruma kona-ba komportamentu ne'ebé tenke asume iha reasaun ho maun-alin sira.

MENSAJEN

Testu nia kontestu inklui parte husi 15,1 ba 15,13. Pasajen ne'e apresenta parágrafu simétriku rua (kf. Rm 15,1-6 no 15,7-13) ne'ebé reprezenta sekuénsia no organizasaun hanesan: a) ezortasaun; b) motivasaun kristolójika; c) iluminaun husi Eskritura; d) súprika finál.

Iha primeira parte pasajen nian (kf. Rm 15,1-6), Paulo ezorta sarani sira atu manán egoizmu hotu no autosufisiénsia no tulun ema sira ne'ebé fraku liu no presiza liu (a); nu'udar motivu ba komportamentu ne'e, Paulo apresenta Kristu nia ezemplu, ne'ebé la buka dalan ida fasil. Maibé hili domin no saran vida (b); komportamentu ne'ebé Paulo husu ba sarani sira (no iha ne'e hahú testu ohin nian) mak ida ne'ebé Eskritura husu ita (c); no, iksunian, Paulo husu ba

“Maromak persevernsa no konsolasaun nian” atu haraik ba sarani sira Roma nian armonia, atu bele hahi’i Maromak ho fuan no neon ida de’it (d).

Iha segunda parte pasajen nian (kf. Rm 15,7-13), Paulo hahu hodi husu fiar-na’in sira atu keta halo diskriminsasaun, maibé simu ema hotu (a); nu’udar motivu ba komportamentu ne’e, Paulo hatudu Kristu nia ezemplu, ne’ebé simu ema hotu (b); no Paulo justifika buat ne’ebé nia hateten ho ezemplu husi Eskritura (iha pontu ne’e mak remata testu ne’ebé liturjia ohin propoin nu’udar segunda leitura), hodi temi ho modu esplísitu testu oioin Testamentu Tuan nian (c); ikusnian, Paulo husu ba “Maromak esperansa nian” atu hakonu fiar-na’in sira ho “ksolok no dame, iha fiar” (d).

Importante liu buat ne’e hotu mak mensajen fundamentál ne’ebé mai husi estrutura maruak ne’e: comunidade tenke moris iha armonia, hodi simu no tulun ema ne’ebé fraku liu, hodi la diskrimina eh eskloi ema ida, iha domin no partilla. Kristu mak ezemplu ne’ebé membru sira tenke nafatin tau iha oin... Moris nune’e mak don ida Maromak nian – ne’ebé fiar-na’in sira tenke husu iha momentu hotu ba Aman.

EVANJELLU – Mt 3,1-12

Hotu tiha Evanjellu Infánsia nian (kf. Mt 1-2), Mateus apresenta figura ne’ebé prepara ema sira atu simu Jezús: João Batista.

João mak gia karizmátiku movimentu ida ho marka populár, ne’ebé hakalaken katak Maromak nia juíz/tesi-lia besik daudaun. Nia moris iha rai-fuik maran Judá nian, iha mota Jordão nia ninin. Ninia mensajen nia sentru mak urjénsia konversaun nian (basá tempu Maromak atu tesi-lia besik ona); nia inklui ritu ida purifikasaun nian ho bee. Karik João hola parte comunidade essénia ne’ebé horik iha Qumran no uza purifikasaun ho bee.

Tuir tradisaun sarani antiga, Jezús iha relasaun ho João nia movimentu, iha inísiu nia vida públia no João nia eskolante balun sai Jezús nia eskolante (kf. Jo 1,35-42).

Sarani dahuluk sira identifika João nu’udar manu-ain ne’ebé haktuir iha Is 40,3 no ho Elias (2 Re 1,8), bo sei haklaken Mesias ne’ebé atu mai (Mt 11,14; 17,11; Mal 3,23-24 eh, iha versaun seluk, 4,5-6). Iha interpretasaun sira-ne’e, João mak ida-ne’ebé mai uluk atu prepara dalan ba Jezús Mesias, ne’ebé Maromak haruka atu haklaken Jahwéh nia ukun.

MENSAJEN

Iha apresentasaun dahuluk Batista nian, iha fatór barak ne’ebé presiza releva: figura, mensajen, reasaun sira ba anúnsiu no komparasaun entre João nia batizmu no Jezús nia batizmu.

Batista mak figura ida ne’ebé, kuestiona no interpela ita. João mosu iha rai-fuik maran (fatin hamamuk an nian, fatin privasaun nian, maibé mós fatin tradisionál enkontru nian entre Jahwéh no Israel) no la’ós iha Templu ka fatin boot sira neebé sosiedade aas Jerusalém nian halibur malu; nia uza “hatais ida halo ho kuda-kamelu nia fulun no sintura ida kesi hale’u nia knotak” (nune’e mós mak Elias hatais – kf. 2 Re 1,8), la’ós rupa furak, ho prega kabeer amlulik sira kapitál nian; ninai hahán uitoan eh kmaan liu (“gafañotu no bani-been fuik”) ne’ebé hatudu kontraste ho bikan spesiál sira ne’ebé enxe meza klase dirigente nian,, Nune’e, João mak ema ida ne’ebé – la’ós de’it ho liafuan, maibé ho nia moris rasik, kuestiona tipu ida moris nian, ne’ebé hateke de’it ba sasán sira, ba soin materiál sira, ba posesu. Nia konvida ema ba konversaun ida, ba mudansa ida valór sira-nian, atu haluha superflu, atu fó atensaun ba esensiál.

Sá loos mak João haklaken? Mateus rezume João nia anúnsiu ho fraze ida: “Imi nakfilak an (“metanoéite”), tanba Reinu lalehan besik ona” (vers. 2). Verbo gregu (metanoéo) iha ne’e

nia signifíkadu mak “muda mentalidade”; maibé, iha ne’e presiza haree tuir perspetiva Testamentu Tuan nian – katak, apelu ida atu fila fali ho modu inkondisionál ba Maromak Aliansa nian.

Tansá mak “konversaun” ne’e urjente liu? Tanba “Reinu lalehan nian” besik ona. Provavelmente, João liga “Reinu” ne’ebé mai ho “Maromak nia tesi-lia”, ne’ebé sei harahun ema aat sira no inaugura, ho ema dí’ak sira, mundu foun (tanba ne’e mak nia ko’alia kona-ba hirus boot ne’ebé sei to’o – kf. vers. 7; no hatutan tan “baliu iha ona ai-hun sira nia abut. Tanba ne’e ai-hun hotu ne’ebé la fó fuan sei tesi no soe ba ahi” – vers. 10). Konversaun urjente liu, iha João nia perspetiva, basá Maromak nia justisa ba istória atu to’o daudaun, perspetiva ida iha teolojia esséniu sira Qumran nian.

Sé mak ema sira destinatáriu mensajen ne’e nian? Mensajen ida ba ema hotu. Mateus ko’alia kona-ba “ema ne’ebé mai husi Jerusalém, husi Judeia tomak no husi rejiaun tomak Jordão nian” no sira hotu simu batizmu husi João iha mota Jordão, hodi konfesa sira-nia salan (kf. vers. 5-6).

Mateus halo referénsia espesiál ba farizeu no saduseu sira, no ba sira João ko’alia maka’as: “rasa samea nian, sé mak hanorin imi atu halai husi hirus boot ne’ebé atu mai? Imi pratika hahalok tuir arrependimentu ne’ebé imi hatudu. Imi keta hanoin katak natón de’it atu dehan: «Abraaun mak ami-nia aman»...” (vers. 7-9). Sira ne’e mak ema sira ne’ebe tanba “ta’uk” eh tanba kuriozidade, mai hasoru João; maski nune’e sira hanoin katak Maromak nia tesi-lia sei la kona sira tanba sira Abraaun nia oan, membru privilejiadu Povu eleitu nian no sira hela iha parte ema dí’ak nian: Maromak labele halo buat seluk se la’ós salva sira, bainhira Nia mai julga no kondena ema aat sira. João fó sai katak laiha salvasaun ne’ebé asegura ona ba sira ne’ebé nia naran hakerek iha rejistu Povu eleitu nian: presiza moris iha konversaun kontínua no halo Maromak nia obra sira: “ai-hun hotu ne’ebé la fó fuan, sei tesi tiha no soe iha ahi laran” (vers. 10).

Iha testu ne’e hatudu momoos, ritu ida João pratika. Ne’e mak halo ema sira ne’ebe adere ba konversaun atu luku iha bee mota Jordão nia laran. Ne’e mak ritu ida pratika iha ambiente judaiku ruma atu hatudu purifikasaun fuan nian... João nia batizmu signifika arrependimentu, perdaun salan nian no agregasaun ba “restu Israel nian”, ne’ebé Maromak nia hirus sei la kona.

Maski nune’e, João haklaken katak: “ida ne’ebé mai tuir ha’u (...) sei sarani imi iha Espíritu Santu no ahi” (vers. 11). Defaktu, Jezús nia batizmu hakat liu dook João nia batizmu: nia konfere ba ida ne’ebé simu nia Maromak nia moris (Espíritu) no halo nia sai “Maromak nia oan”; implika mós inkorporasaun iha Kreda (komunidade sira ne’ebé adere ba proposta salvasaun Kristu lori mai) no partisipasaun iha misaun ativa Kreda nain (kf. Apóstolu sira nia Hahalok 2,1-4). La signifika de’it arrependimentu no perdaun salan nian; signifika kuadru ida moris foun nian, relasaun filiasaun nian ho Maromak no fraternidade ho Jezús no batizadu seluk.